



Inatsisartuni ilaasortaq, Hans Enoksen
Maani/

§ 37 naapertorlugu apeqquteqaammut nr. 081 2024-mut akissut.

Inatsisartut suleriaasissaanni § 37-mi imm. 1 naapertorlugu apeqqutinik Naalakkersuisunut nassiussaqaarsimavutit, Kalaallit Nunaanni takornarissanik piniartitsisartut pillugit. Apeqqutitit uanga suliaasaqarfisannut akisassanngortinneqaarsimapput.

Apeqquteqaat 1): Nunatsinni takornarissanit piniartitsisartut assersuutigalugu umimmannik tutunillu ataatsimut katillugit qassiuppat?

1)-mut akissuteqaat: Nunatsinni takornarissanik piniartitsisartut suliffeqarfiit akuersissutillit (autorisationillit) ingerlasut katillugit 15-20-iupput, suliffeqarfiit ataasiakkaat aallartinnissamik pilersaaruteqartut ilanngullugit.

Apeqquteqaat 2): Uumasut pisassat killeqartarmata suna pissutaava nuna allamiut takornarissanik piniartitsisariaqartarannut?

2)-mut akissuteqaat: Apeqquteqaammut nr. 2-mut allaqqasoq akissuteqaammi kalaallisoortaa malinneqarpoq nutsernera kukkuneqarmat.

Akiliisitsillutik piniartitsinermik aaqqissuussisartut annerusumik angutivissanik inersimasunik piniartitsisartuupput. Kalaallit Nunaanni umimmannik tutunillu akiliisitsilluni piniartitsinermik aaqqissuussisartut tamarmik nunatsinni najugaqavissuupput akuersissuteqarnissamullu piumasaqaatinik naammassinnittuullutik.

3) *Naalakkersuisut eqqarsaatersuuteqarpat piniartitsisartut kalaalinnanngortinneqarnissaannik?*

3)-mut akissuteqaat: Nunatsinni umimmannik tutunillu piniartitsinissamut piumasaqaatinik Akiliuteqarluni aallaaniarneq aalisarnerlu pillugit Namminersornerullutik Oqartussat nalunaarutaanni nr. 22-mi 19. Aggusti 2022-imi taaneqartunik naammassinnittut akuersissuteqarnissamut qinnuteqarsinnaapput. Piumasaqaatit ilaatigut makkuupput: Kalaallit Nunaanni najugaqavissuunissaq aamma Kalaallit Nunaanni inatsisit malillugit inuussutissarsiummik ingerlataqarnissamut piumasaqaatinik naammassinninnissaq.

Naalakkersuisut qulaani taaneqartoq nalunaarut nutarsartippaat, tassunga ilanngullugu piumasaqaatit erseqqissaateqarfigalugit inatsit nutaaq tunngavigalugu.

Inatsisartut Aallaaniarneq piniarnerlu pillugit inatsisaanni nutaami nr. 34, 13. Juni 2023-meersumi akuerineqartumi § 18-mi akiliisitsilluni piniartitsinermut atatillugu piumasaqaatinik sukaterinissamut tunngavissaqarpoq. Qinnuteqartut tamarmik

Ulloq: 13-05-2024
Suliap normua: 2024 - 8956
Akt normu: 24149498

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apn@nanoq.gl
www.naalakkersuisut.gl

aalajangersimasumik najugaqarnissamut tamakkiisumillu akileraartartuunissamut piumasaqaatinik naammassinninissamut piumasaqaateqarpoq.

4) Sooq nunaqavissoq Kalaaleq nunamini piniartitsisartoq takornarissanillu sullissisoq nunami nammineq perorfimminni nunamik allamiumik piniartitsisartumik peeqquneqassagami nunami erligussaalluni?

4)-mut akissuteqaat: Kangerlussuup eqqaani umimmannik tutunillu akiliisitsilluni piniartitsineq januaarip aallaqaataaniit 2019-mi allannguuteqarpoq. Taamanili piniartitsisartut nunami sumiiffinni aalajangersimasuni piniartitsinermut akuersissuteqartarnissaat atuutilerpoq. Akuersissutinik pineqartunik taamanili pigisaqalersut nunami sumiiffinni (koncessioneqarfinni) aalajangersimasuni umimmannik tutunillu akiliisitsilluni piniartitsineq eqqarsaatigalugu kisermaaffigilerpaat. Nunami sumiiffiit pineqartut (koncessioneqarfiit) avataanni akiliisitsillutik piniartitsisartut tamarmik assigiimmik piumasaqaatitalimmik akiliisitsillutik piniartitsisinnaapput. Taamatut pisoqarnermi sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat nr. 19, 3. Decembari 2012-imeersoq malinneqarpoq, tamannalu naalackersuisoqarfimmi allami oqartussaaffigineqarpoq. Akuersissuteqarnissamut qinnuteqarsinnaanermut piumasaqaatit ilaatigut makkuupput: Kalaallit Nunaanni najugaqavisuunissaq aamma tamakkiisumik akileraartartuunissaq.

5) Pissutsit tamakku aaqqinniarlugit Naalackersuisut qanoq eqqarsarpat?

5)-mut akissuteqaat: 3)-mut akissuteqaat takuuk.

6) Piniartitsisartut nunatta avataaneersut akuersissutaarullugit mattunniarpisigit?

6)-mut akissuteqaat: 3)-mut aamma 4)-mut akissuteqaatit takukkit.

Inussiarnersumik inyulluaqqusillunga



Kim Kielsen
Aalisarnermut Piniarnermullu Naalackersuisoq